

Dr M sahkan dalam negeri semasa peristiwa Memali
MalaysiaKini.com
Apr 10, 2014

Tun Dr Mahathir Mohamad mengesahkan beliau berada dalam negeri sewaktu peristiwa Memali tetapi tidak ingat sama ada Tun Musa Hitam memintanya supaya jangan pergi ke China.

Dr Mahathir yang merupakan perdana menteri ketika itu berkata peristiwa Memali berlaku pada 19 November 1985, sehari sebelum beliau berlepas ke China.

"Saya tidak ingat yang Tun Musa datang berjumpa saya untuk saya tidak pergi ke Beijing tetapi beliau berada di lapangan terbang bersama dengan ramai orang yang ingin ucap selamat pemergian saya ke China.

"Di waktu itu pun saya tidak ingat yang Tun Musa menasihati supaya saya tidak pergi luar negeri," katanya dalam blognya hari ini.

Katanya, beliau begitu yakin yang timbalan perdana menteri dapat menangani keadaan "sehingga saya melantik beliau sebagai pemangku perdana menteri".

"Beliaulah yang menjawab YB Tuan Gooi Hock Seng (Bukit Bendera) yang telah mohon menanggung mesyuarat Dewan Rakyat pada 20 November 1985 untuk membincang "Perintah Berkurung akibat Pembunuhan di Baling Kedah" (Hansard).

"Saya kembali ke tanahair pada 28 November 1985. Semasa berada di luar Negara tidak ada apa-apa yang berlaku yang tidak boleh ditangani oleh timbalan perdana menteri yang memangku jawatan perdana menteri," tulis Dr Mahathir.

Dalam satu forum di Kota Bharu baru-baru ini, Musa berkata Dr Mahathir berada di Kuala Lumpur sewaktu peristiwa Memali dan berkata beliau telah meminta Dr Mahathir membatalkan lawatannya ke China.

Copyright © 1999-2012 Mkini Dotcom Sdn. Bhd
Source: <http://www.malaysiakini.com/news/259685>